

PENUTUP

PENUTUP

6.1 KESIMPULAN

Sebagai penutup, penulis merumuskan beberapa kesimpulan sepanjang penelitian dan penyelidikan terhadap kajian ini yang menyentuh konsep kepaderian menurut Kristian dan pandangan Islam mengenainya. Antara rumusan tersebut ialah :

1. Paderi dan ulama adalah orang yang paling dihormati dan disegani dalam komuniti Kristian dan Islam. Ini disebabkan paderi dan ulama berperanan membentuk individu yang baik dan beriman dari segenap aspek kehidupan manusia.
2. Paderi dan ulama merupakan individu yang mempunyai fungsi yang sama untuk menjaga dan menguruskan hal-hal agama Kristian atau agama Islam.
3. Paderi Kristian dan ulama Islam bertanggungjawab membangunkan ketamadunan dan kemajuan manusia dari segenap segi khususnya meningkatkan mutu akhlak manusia.

4. Sebagai ketua agama Kristian dan Islam, paderi atau ulama perlu berhati-hati di dalam mengeluarkan sebarang pendapat terutamanya yang menyentuh persoalan agama. Ini adalah kerana ia memberi kesan yang amat mendalam kepada pengikut iaitu mereka akan teguh berpegang dengan pendapat paderi ataupun ulama walaupun pendapat itu ternyata salah atau menyimpang daripada landasan agama.
5. Institusi gereja dan masjid adalah institusi yang menjadi nadi penggerak utama kemantapan agama di kalangan umat Kristian dan Islam serta pusat penyebaran agama kepada manusia.
6. Walaupun paderi Kristian dan ulama Islam mempunyai ciri-ciri persamaan, namun jurang perbezaan antara keduanya lebih ketara. Perbezaan ini banyak melibatkan soal peranan, bidang kuasa, keistimewaan dan dasar perjuangan paderi dan ulama. Antaranya ialah paderi berperanan dan berkuasa mengampunkan dosa manusia. Ini bertentangan dengan Islam dan bercanggah dengan kerasionalan akal. Menurut Islam, para nabi dan rasul sendiri tidak mampu menghapuskan kesalahan atau dosa orang lain apatah lagi manusia biasa, mereka lebih-lebih lagi tidak berkelayakan melakukannya.
7. Dakwah Kristian dilihat mengandungi campurtangan para pengikut Jesus terutamanya St. Paul. Ini berdasarkan perubahan-perubahan yang berlaku

di dalam agama tersebut seperti upacara *baptist* menggantikan *circumcision*, pengiktirafan ketuhanan Jesus Christ dan *The Holy Spirit*, paderi mesti mengamalkan *celibacy* dan sebagainya yang ternyata tidak pernah dibawa oleh Jesus Christ dalam seruannya kepada manusia sebelum ini.

8. Selain itu, seruan dakwah Jesus juga dilihat telah diubah dan diperkembangkan kepada seluruh dunia berbeza dari seruan asal iaitu hanya kepada golongan Yahudi sahaja.
9. Pertentangan antara konsep *celibacy* dengan fitrah naluri manusia yang inginkan pasangan hidup banyak menimbulkan masalah kepada golongan paderi hingga tercetusnya gejala salah laku di gereja. Ini menjelaskan bahawa konsep *celibacy* bukan datangnya daripada Jesus Christ atau Nabi 'Isā a.s..

6.2 SARANAN

Antara saranan-saranan penulis ialah :

1. Paderi tidak sepatutnya mengambil alih tugas pengampunan dosa manusia kerana itu adalah hak mutlak Tuhan.
2. Paderi juga tidak boleh dengan sewenang-wenangnya mengubah dasar agama seperti mempertuhankan Jesus Christ kerana Jesus Christ adalah anak manusia dan mempunyai fitrah manusia. Pengiktirafan Jesus itu tuhan sebenarnya menghina kekuasaan dan kemampuan tuhan mentadbir alam semesta ini.
3. Paderi perlu menilai kembali kebenaran dakwaan mereka sebagai seorang yang maksum kerana paderi sama sekali tidak akan dapat mencapai taraf para utusan tuhan yang mulia.
4. Sebagai ketua agama yang menyeru manusia ke arah kebenaran dan keselamatan hidup di dunia dan akhirat, paderi seharusnya terlebih dahulu memihak dan kembali kepada kebenaran walaupun ia bertentangan dengan pegangan dan ajaran yang telah dianuti.
5. Dalam usaha menguasai ilmu-ilmu dunia untuk kepentingan agama, golongan paderi juga tidak boleh menafikan dan menolak kebenaran ilmu-

ilmu tersebut yang akhirnya membawa manusia kepada Tuhan yang Maha Esa dan Maha Berkuasa.

6. Kaitan paderi dan *The Holy Spirit* perlu dikaji semula kerana jika *The Holy Spirit* dikatakan sebagai pembimbing manusia, maka ia sebenarnya menggambarkan bahawa tuhan itu kurang bijaksana dalam mengatur kehidupan manusia dan segala perutusannya melalui para rasul adalah sia-sia kerana manusia perlu sentiasa diawasi dan dibimbing oleh *The Holy Spirit* setiap masa.
7. Golongan paderi seharusnya kembali kepada tuntutan fitrah semulajadi manusia dalam segenap hal kerana pertentangan dengan fitrah itu hanya mengundang masalah yang merugikan diri manusia itu sendiri.
8. Selaku golongan yang berpengaruh dan dihormati masyarakat, ulama seharusnya tidak menggunakan kuasa yang ada pada mereka untuk kepentingan peribadi seperti mendapatkan jawatan, mengaut keuntungan atau mendapat keistimewaan. Sekiranya mereka mendahulukan atau mementingkan urusan dunia, melebihi kepentingan agama, maka lahirlah penghuni dunia yang materialistik, yang merosakkan keharmonian sarwajagat ini sebagaimana yang telah berlaku ke atas golongan paderi. Jika runtuh akhlak mereka, maka runtuhalah akhlak manusia.